



Մ Ա Յ Ր Ա Թ Ո Ռ Ո Ւ Մ

1953 թվականի հունվարի 1-ին Մայր Տաճարում ամանորի առթիվ տեղի ունեցավ հանդիսավոր սուրբ պատարագ, ամբողջ միաբանության և ժողովրդի խուռն բազմության ներկայությամբ: Պատարագին էր գերաշնորհ Տ. Սահակ եպիսկոպոսը: Սուրբ պատարագի վերջում սրբազանը հավուր պատշաճի քարոզ խոսեց՝ գեղեցիկ կերպով բնորոշելով հաջողություններով և նվաճումներով պսակված անցած տարիի և շերմորեն ողջունելով նոր տարվա մուտքը:

Սույն թվականի հունվարի 3-ին գերաշնորհ Վահան արքեպիսկոպոսը, ուղեկցությամբ Մայր Աթոռի միաբան արժանապատիվ Տ. Նիկոլ ավագ քահանա Բավելյանի, մեկնեց Բաքվի թեմ՝ Բաքվում Ս. Ծննդյան և Զրօրհնյաց տոնակատարությունները ավելի հանդիսավորությամբ անց կացնելու համար:

Գերաշնորհ սրբազան հայրը Բաքվում Ծննդյան և Զրօրհնյաց տոնակատարությունները անց կացնելուց հետո մեկնեց Վրաստանի մայրաքաղաք Քրեխիսի՝ թեմական գործերը վերստուգելու և համապատասխան կարգադրություններ անելու համար:

Հունվարի 5-ին Մայր Տաճարում տեղի ունեցավ Ս. Ծննդյան ճրագալույցի երեկոյան հանդիսավոր սուրբ պատարագ, հավատացյալների մեծ բազմության ներկայությամբ: Պատարագին էր արժանապատիվ Տ. Խորեն ավագ քահանա Շուշանյանը:

Հունվարի 6-ին՝ Ս. Ծննդյան և Մկրտության օրը տոնվեց ամենայն հանդիսավորությամբ: Տաճարը լի էր խուռն բազմությամբ: Պատարագին էր գերաշնորհ Տ. Սահակ եպիսկոպոսը, որն իր հավուր պատշաճի քարոզում վեր հանեց Քրիստոսի մարդկության համամարդկային նշանակությունը:

Հունվարի 5-ին և 6-ին տոնակատարությունների առթիվ Մայր Աթոռից Օշական մեկնեցին բարեշնորհ Նահապետ արեղա Մուրադյանը և Աթոռի կրտսեր միաբան շնորհունակ Գուրգեն սարկավազը:

Տոներից անմիջապես հետո նրանք վերադարձան Մայր Աթոռ:

Ս. Էջմիածնի Հոգևոր Ճեմարանի ուսանողները ամանորի և Ս. Ծննդյան տոների արձակուրդների կապակցությամբ մեկնեցին իրենց հարազատների մոտ: Հունվարի 12-ին, արձակուրդներից հետո սկսվեցին կանոնավոր պարապմունքները:

Հունվարի 13-ին՝ Տիրոջ Անվանակոչության տոնի օրը, և հունվարի 15-ին՝ Ս. Հովհաննու Կարապետի տոնի օրը, մեծ շուքով տոնվեցին Մայր Աթոռում: Նրկու դեպքում էլ պատարագին էր բարեշնորհ Կոստանդին արեղա Թառլանյանը:

Հունվարի 14-ին գերաշնորհ՝ Տ. Սահակ եպիսկոպոս Տեր-Հովհաննիսյանը, ուղեկցությամբ շնորհունակ Սարգիս սարկավագի, Վեհափառ Հայրապետի կարգադրությամբ, մեկնեց Հյուսիսային Կովկասի հայաշատ թեմը, Արմավիր քաղաքը՝ թեմական գործերի հետ ծանոթանալու համար:

Հունվար ամսվա ընթացքում, էքսկուրսանտների բազմաթիվ խմբեր (թե՛ արտասահմանից և թե՛ Սովետական Միության այլևայլ քաղաքներից՝ Մոսկվայից, Բաքվից և այլ քաղաքներից), այցելել են Ս. էջմիածին՝ նրա դարավոր հնությունները ուսումնասիրելու և տեսնելու համար:

Այցելող խմբերին տրվում էին բազմակողմանի բացատրություններ՝ Մայր Աթոռի միաբանության կողմից:

Փետրվարի 1-ին Մայր Տաճարում, հանդիսավոր պատարագից հետո, Մայր Աթոռի

հանգուցյալ ավագագույն միաբան Ռուբեն արքեպիսկոպոսի մահվան տարելիցի կապակցությամբ, պատարագիչ սրբազան հայրը իր մխիթարական խոսքերով վեր հանեց հանգուցյալի արժանավոր կյանքն ու գործունեությունը և սփոփեց նրա հարազատների վիշտը:

Փետրվարի 5-ին, Վեհափառ Հայրապետի կարգադրությամբ, թեմական գործերով Հյուսիսային Կովկասի և Նոր-Նախիջևանի թեմից Մայր Աթոռ էր ժամանել արժանապատիվ Տ. Մկրտիչ քահանա Չորչուխյանը:

Փետրվարի 7-ին Մայր Աթոռի միաբանությունը ներքին կարգով նշեց գերաշնորհ Տ. Սահակ եպիսկոպոս Տեր-Հովհաննիսյանի քահանայական և հասարակական գործունեության 50 տարին: Միաբանության կողմից հոբելյարին մատուցվեցին նվերներ:

